

鍾山縣志

卷之二

歷史

沿革

搜前後之漢史肇造堪稽覽新舊之唐書變遷叠見陳隋之廢興靡定宋明亦移徙連番有清猶屬鎮區民國方成縣治此鍾山之歷史宜握筆以直書也蓋竟委窮源曩昔曾留陳蹟而分門別類當今應有新編雖挾冊亡羊吾輩恐多貽誤而按圖索驥先賢儘可觀型翻來鉅製鴻章數千年瞭如指掌恍到石渠虎觀廿一史約畧經心踵成例以攄詞一貂可續仿遺規而紀事三豕無訛志歷史

沿革

鍾山在周秦以上爲禹貢荊州界古百粵地也縣之東北城中四區舊隸富川西南二區舊隸昭平自漢元鼎六年定越地始置富川縣隸蒼梧郡治設鍾山三國屬吳隸臨賀郡晉及南朝并因之隋大業時屬始安郡唐武德初改屬賀州貞觀十四年

析入馮乘地升爲富州思勳馬江龍平三縣皆屬之德宗時改名富水縣尋復名富川并屬賀州宋開寶四年隸廣南東路大觀二年改隸廣南西路元因之明洪武二年屬賀州十年改屬潯州府後屬平樂府二十九年徙縣治于今富川城始名之日鍾山鎮別設通判治理之清末地方自治成立通判裁

昭平舊名龍平漢晉時臨賀地南朝梁析臨賀太平嶺地置南郡附郭爲龍平今北區之西嶺山麓即龍平縣治舊址也隋屬始安郡唐屬富州宋開寶時省入昭州熙寧中改屬梧州元豐間復屬昭州宣和時改名昭平縣淳熙六年復名龍平縣元初省入平樂縣明萬曆四年設建昭平縣屬平樂府并撥富川之二五都地

今南區石龍迴龍二

團入之

縣之東北城中四區隸富川時故合爲一區曰鍾山鎮區西區隸昭平時曰防字區南區隸昭平時曰樂字區當清之末世民治萌芽三區人士因同一風俗習慣之關係以各距縣治寫遠於教育行政之實施鞭長莫及議併三區設一縣較便治理民

國六年呈奉

廣西督軍兼省長陳核准轉奉

大總統黎批准設立并定名曰鍾山縣隸桂林道

鍾山縣志

卷之二 歷史沿革

五二